

# 1 Korin

---

**1** <sup>1</sup>Aya Pol, Negur nē oroyam Kristus Jesus nē aposel wō auf nigin iweignan, neda turada Sostenes ado,

<sup>2</sup>Korin oun Negur nē sios ā bun, pas enei matotkeneik. Ā Kristus Jesus bun fateuleī fen, fateul ubodōgouf nigin iweignein, are tamo kayau ganan fire firen difar fen, neda Odug Jesus Kristus, idi neid Odug ado neda Odug ī yana dalesedig anidi geid weim iweignein.

<sup>3</sup>Negur neda Tamada ado Odug Jesus Kristus neid wau ifenēya ado wau inosiya, ā bun ibodōf.

## Pol Negur De Fiyen

<sup>4</sup>Aya wededem ā nigin Negur de afiyēdig, ere nigin, yogon wau ifenēya Kristus Jesus bun ā ifenein. <sup>5</sup>Ere nigin, Jesus bunem ereb ereb ganan bun, ā kisi feleya ifenein, are āgenei wogō ganan ado keleī ganan bun, <sup>6</sup>ere nigin, Kristus nigin neda wogōya, ā bun megeir ifaren. <sup>7</sup>Anī nigin, ā neda Odug Jesus Kristus yaorouf nigin wauī fatuk unog fen, tarig mog, ā Awa Uur nē ege luwa taka to lau gef. <sup>8</sup>Jesus ā total irouyeik ile, idikeleya bun ilauf, anī bunem, neda Odug Jesus Kristus isiyouf nē naa bun, ā bouweī od sāf. <sup>9</sup>Negur ī, yogon Naal Jesus Kristus, neda Odug geid, ā nigal gouf nigin iweignein, ī ereb yef, de age foug bagai.

## Sios Atun Fara Fiya

<sup>10</sup>Turau tar, aya neda Odug Jesus Kristus yana bunem total bagai arokeneik, are ā atun fara fiya taka to ibodōf nigin, ā ganan abob nigin wauī tekelei yen ken, ā wauī ado kisi tekelei bagai ubodōgouf. <sup>11</sup>Neu turau tar, tunī Kloe nē ibor bun tamal dirokanan, are ā atun luwa irouya ibodok. <sup>12</sup>Aya enei wogō auf, are eig fiya, ā atun takam irok, “Aya Pol dō afef,” takam irok, “Aya Apolos dō afef,” takam irok, “Aya Pita dō afef,” takam irok, “Aya Kristus dō afef.”

<sup>13</sup>Kristus ī fara furu fen de? Aya Pol ī, ā nigin aa tetek bun dun de? Ā aya Pol yanau bunem naan digunein de? <sup>14</sup>Aya Negur de afiyek, are aya ā taka to naan agunen, Krispus ado Gaius dogol naan agunēdin. <sup>15</sup>Anī nigin, taka nem to irōf, “Aya Pol yana nem naan agun.” <sup>16</sup>(Momoi, aya

Stefanas nē ibor tareg naan agunēdin, anī teten, takag naan agunen be anī, to kisi afef.) <sup>17</sup>Ere nigin, Kristus ī aya naan agunēdiyof nigin to sur fiyan, anī ere, biya od wogō auf nigin sur fiyan, are Kristus nē aa tetek nē megeir to yalelauf nigin, tamo nē kisi biya wogōya anī bunem sã.

### Kristus Ī, Negur Nē Kisi Biya Ado Megeir

<sup>18</sup>Jesus aa tetek bun laa fen ya od anī, idi inanakelediyof anidi bun are neneya, anī ere, ada isennadaf bun, od are Negur nē megeir. <sup>19</sup>Ere nigin, Negur nē Itotoya bun eig ye irok:

“Aya tamo kisi biya adodo neid kisi biya daū afalauf, aya tamo keleī odug adodo neid keleī alelauf.”<sup>a</sup>

<sup>20</sup>Tamo kisi biya adodo nain? Tamo keleī odug adodo nain? Sain enei nē keleī yaleya nigin luwa irouya tamo nain? Negur ī tenebur enei nē kisi biya anī to neneya inon de? <sup>21</sup>Negur nē kisi biya bunem, tenebur tamo dogo neid kisi biya anim, Negur nigin to kelein, anī nigin, neneya od dedig anī wogō taudig bunem, idi momoi def anidi isennēdiya nigin, Negur wau al fen. <sup>22</sup>Juda idi memelik nē uris dilouf nigin dirōdig, Grik idi kisi biya anī dimirēdig. <sup>23</sup>Anī ere, ada Kristus aa tetek bun dun anī wogō taudig, od anī Juda idi bun, ye tū fiya od, haiden idi bun, are neneya od, <sup>24</sup>anī ere, idi Juda ado Grik Negurem iweignēdin anidi bun, Kristus ī Negur nē megeir, Negur nē kisi biya. <sup>25</sup>Ere nigin, Negur nē neneya kisi are, tamo nē kisi biya wal fiya, Negur nē folo reya are, tamo nē megeir wal fiya.

<sup>26</sup>Turau tar, ā naig be fiya ufareg mog, ā iweignein anī kisi gouf. Ā musei sam, tamo nē keleī bunem, kisi biya ado wowā gen. Musei sam totol ado wowā gen. Musei sam yeneī ado wowā gen. <sup>27</sup>Anī ere, Negur kisi biya adodo mama ifenēdiyof nigin, tenebur enei nē neneya igirnēdin. Negur ī megeir adodo mama ifenēdiyof nigin, tenebur enei nē folo reya igirnēdin. <sup>28</sup>Negur ī tenebur enei nē yeneid sāsā, meleid irim lai difedig ado, ereb taka sã dedig anī igirnēdin, are ereb ado dedig anī, yana sa kalauf nigin age fen, <sup>29</sup>anī bunem, Negur mala bun, taka nem yogo yana to yalesauf. <sup>30</sup>Negur nigin ā Kristus Jesus bun ubodōgef, Jesus ī ada nigin Negur bunem kisi biya wō yen, are ada ī bunem madur bagai, fateul wowā tau fen, isennēya talen. <sup>31</sup>Anī nigin, Negur nē Itotoya bun eig ye irok, “Tamo ī yogo yana yalesef are, Odug ereb age fen anī nigin yana yalesauf.”<sup>b</sup>

**2** <sup>1</sup>Turau tar, aya ā gein asi fen, Negur yaor afouf nigin wogō ayein sain bun, aya od biya odug nem be, kisi biya odug nem to wogō aun. <sup>2</sup>Ere nigin, aya ā geid tabodon sain, aya ereb ereb ganan wederou tu kel fen, Jesus Kristus ado, ī aa tetek bun laa fen anī dogol kisi afouf nigin kisi

<sup>a</sup> 1:19 Asaia 29:14    <sup>b</sup> 1:31 Jeremaia 9:24

afokelen. <sup>3</sup>Sain aya ā gein asin, aya totolou sã, fatuk bagai kumĩ tererẽ aun. <sup>4</sup>Neu od ado neu wogõya, are kisi biya nẽ, wauĩ faleiya nẽ od bunem sã, Awa Uur nẽ megeir nẽ ifelnẽya bunem, <sup>5</sup>are āgenei momoiya, tamo nẽ kisi biya bun to ibodõf, Negur nẽ megeir bun ibodõf nigin age afen.

### Awa Uur Nẽ Kisi Biya

<sup>6</sup>Ada kisi biya nẽ od atīya anidi atun wogõ taudig, anĩ ere, kisi biya anĩ, are sain enei nẽ sã, sain enei nẽ uyu irouya, fau inanakelediyouf anidi neid sã. <sup>7</sup>Anĩ ere, ada, Negur nẽ waa kisi biya anĩ, wogõ taudig, are iminẽyan ibodok, teneub kare fiya sã mog Negur neda fula fiya medeīya nigin mogo igirin anĩ. <sup>8</sup>Sain enei nẽ uyu irouya takam, kisi biya anĩ to kelein. Idi kisi biya anĩ keleim are, idi fula fiya medeīya nẽ Odug aa tetek bun to dum. <sup>9</sup>Anĩ ere, Negur nẽ Itotoya eig ye irok kilei:

“Negur nigin waud laa fedig idi nigin Negur dodok fen anĩ,  
malam taka to ilen,  
weder takam to karĩ yen,  
kisi takam to fokõ yen.”<sup>c</sup>

<sup>10</sup>Anĩ ere, Negur yogon Awa Uurem ada bun anĩ yaor fen.

Awa Uur ĩ ereb ereb ganan fai yeledig, Negur nẽ ereb ereb ilon bagaig fai yeledig. <sup>11</sup>Tamo atun aim, tamo taka nẽ kisi keleĩ? Are tamo anĩ nẽ uurem dogol keleĩ. Age fiya bagai, tamo takam Negur nẽ kisi keleĩ sã, Negur nẽ Awa Uurem dogol keleĩ. <sup>12</sup>Ada teneub enei nẽ uur to talen, anĩ ere, ada Awa Uur Negur bun tamal talen, are ereb Negur wau sã ifanadan anĩ, ada keleĩ youf nigin age tafen. <sup>13</sup>Ada enei anĩ wogõ taudig, are tamo nẽ kisi biya bunem od difelnadan anĩ bunem sã, are od Awa Uurem ifelnadan anĩ bunem. Ada Awa Uur nẽ od bunem Awa Uur nẽ kisi wogõ taudig. <sup>14</sup>Tamo Awa Uur sã ĩ, Negur nẽ Awa Uur bun tamal ereb isif anĩ to yale iroudig, ere nigin, yogon kariya bun, are neneya. ĩ anĩ keleīya nigin kisi feleya sã, ere nigin, are Awa Uur adodom dogol es difedig. <sup>15</sup>Awa Uur ado tamo ĩ, ereb ereb ganan nigin es fedidig, anĩ ere, ĩ yogo taka nem to es fiyēf. <sup>16</sup>Negur nẽ Itotoya eig ye irok:

“Aim Odug nẽ kisi keleĩ ken,  
ĩ fadef fiyēf?”<sup>d</sup>

Anĩ ere, ada Kristus nẽ kisi ado.

### Sios Bun Fara Fiya

**3** <sup>1</sup>Turau tar, aya ā momoiya nigin atīya gen to ayein, ā teneub enei nẽ dogol, ā Kristus bun momou gen ayein. <sup>2</sup>Aya su afenein, saaf total anĩ to afenein, ere nigin, ā anĩ nigin to saika gen. Momoi, ā gamag fau to saika gef. <sup>3</sup>Ā fau teneub enei nẽ dogol ubodõgef. Ā atun, kiyeĩ ado luwa

<sup>c</sup> 2:9 Asaia 64:4    <sup>d</sup> 2:16 Asaia 40:13

irouya ibodok, anī nigin, ā fau teneub enei nē sã de? Ā teneub enei nē tamo gen to ago gef de? <sup>4</sup>Takam irok, “Aya Pol dō afef,” takam irok, “Aya Apolos dō afef,” ago gouf are, ā teneub enei nē tamo sã de?

<sup>5</sup>Agef ilauf are, Apolos ī ai? Pol ī ai? Amā Negur nē kabī tamo dogol, amā bunem ā momoi gen, are Odugem kabī morou morou ifanaman kilei. <sup>6</sup>Ayam faat atenē di, Apolosem naan fen, anī ere, Negurem odugouf nigin age fen. <sup>7</sup>Anī nigin, faat itenēya tamo ado naan fiya tamo are ege, anī ere, Negur ī yogo dogol odug, ere nigin, ī ereb odugouf nigin age fedig. <sup>8</sup>Faat itenēya tamo ado naan fiya tamo, idi kariya tekelei ado. Negur idi mugu mugu kabī dalen kilei, mala solo ifenēdiyof. <sup>9</sup>Ere nigin, amā Negur nē kabī tura tar, ā Negur nē kabī akor, Negur nē fō.

<sup>10</sup>Negur ī aya wau ifenēya ifanan anī bunem, aya fō inoya keleī biya tamo gen, fō inoya nigin gariya anon, age afe di, taka nem anī teten fō inof. Anī ere, tamo mugu mugu el de, lo de fen, fō dinouf nigin lo difalauf. <sup>11</sup>Ere nigin, fō gariya inon, are Jesus Kristus, taka nem fō gariya fire inoya kisi feleya sã. <sup>12</sup>Tamo takam fō gariya enei teten, gol, silwa, meein moni odug, aa, yeye be, wit turu nem fō inouf are, <sup>13</sup>yogon kabī naig be fiya are yaorouf, ere nigin, Kristus nē naa bun, anī lalan bun irusi inouf. Are yã ado wō ye di, yã anim tamo mugu mugu nē kabī nē kaū es fouf. <sup>14</sup>Ī ereb inon anī ifarlauf are, ī yogon mala solo yalouf. <sup>15</sup>Ī ereb inon anī isaikalauf are, ī agogon youf. Ī yogo Negurem kel yalouf, anī ere, ī yã malan tamal ulō yesiya tamo gen ibodōf.

<sup>16</sup>Ā aug are Negur nē tempel, Negur nē Awa Uur ā namein ibodōdig anī, ā to keleī de? <sup>17</sup>Taka ī Negur nē tempel daū fouf are, Negur ī tamo anī daūf irailauf, ere nigin, Negur nē tempel are fateul, are ā tempel anī.

<sup>18</sup>Ā aug to udegnēgouf. Āgenei taka ī, gama sain enei nē keleī bunem, aya kisi biya ado yef are, ī neneya wō youf bagai, are ī kisi biya ado wō youf nigin age fouf. <sup>19</sup>Ere nigin, Negur mala bun, teneub enei nē kisi biya are neneya. Negur nē Itotoya eig ye irok kilei, “Negur ī, kisi biya adodo tamo dogo neid keleī anim kor bun dilelel mog, gei fedidig,”<sup>e</sup> <sup>20</sup>Negur nē Itotoya takag irok, “Odug ī keleī, kisi biya adodo tamo neid kisi, are ege.”<sup>f</sup> <sup>21</sup>Anī nigin, tamo yeneid to walesagauf! Ere nigin, ereb ereb ganan are āgenei, <sup>22</sup>Pol, Apolos, Pita, teneub enei, mata ibodōya, laa, gama be, dumen, ereb ereb ganan, are āgenei, <sup>23</sup>ā Kristus nē, Kristus ī Negur nē.

#### Kristus Nē Aposel Tar

**4** <sup>1</sup>Anī nigin, tamo idi, amā nigin, idi Kristus nē kabī tamo tar, Negur nē waa lo fiya nigin idi imeid bun inon de fen, kisi difouf. <sup>2</sup>Tamo idi ereb lo difouf nigin imeid bun inon anidi, dogo neid marau sigor dō difef dile, age difouf anī, marau orof. <sup>3</sup>Ā aya es wiyagef be, tamo nē kot bun es

<sup>e</sup> 3:19 Job 5:13    <sup>f</sup> 3:20 Sam 94:11

difiyaf, are aya to sii fiyaf. Momoi, aya yug nigineg to es afedig. <sup>4</sup>Neu kisi are karētut, anī ere, anim aya mosor sã to auf. Odug im aya es fiyaf. <sup>5</sup>Anī nigin, es fiya nē sain fau wōya sã mog, to es gouf. Tari gef uleg, Odug isiyouf bun. Ī ereb gugum bun iminek anī lalan bun irou isi fen, tamo neid waud bun kisi ibodok anī yaor fouf. Sain anī bun, idi mugu mugu Negur bun yana odug dalouf.

<sup>6</sup>Turau tar, gama aya, āgenei biya fiya nigin, ereb enei arokenein, aya yug ado Apolos bunem, afelnein, anī bunem, ā wogōya eig fiya nē gariya, are amā bun keleī walogouf, “Itotoya bun yenek anī to ufodulagauf.” Ā anī keleī youf are, ā tamo taka anī yana waleseg fen, taka to lai gouf. <sup>7</sup>Ere nigin, aim ō, taka wal fiya inenok? Ō mogo ado, ere anī ō to walen? Ō mogo anī walen ouf are, ere nigin ō anī to walen gen, ogo yanā walesef?

<sup>8</sup>Ereb ā oroyeik ganan ā mogo ado. Ā mogo safina kisi feleya bagai ubodōgef. Ā mogo king wowā gen, are amā geid sã. Amā ā geid king wowā tauf nigin, ā momoi bagai king wowā gem anī, aya orouf bagai. <sup>9</sup>Ere nigin, aya kisi afef, Negur ĩ amā aposel, tamo yukesiya nigin dinenēdig gen, tamo dilouf nigin, gī bun idikeleyan bagai inenaman. Saa teneub ado, are tamo ado engel meleid bun, amā fele difamāf nigin inoman. <sup>10</sup>Amā Kristus nigin neneya mabodok, anī ere, ā Kristus bun kisi biya bagai ubodōgef. Amā total sã mabodok, anī ere, ā total ubodōgef. Ā yeneī dalesedig, amā yanamā to dalesedig. <sup>11</sup>Kulu nem isi gama sain enei bun, amā naū ado naan ail mayok, amā gabar masasak mafilaik, amā darau difanamak, amā fō sã. <sup>12</sup>Amā mug imamam kabī total maledig. Sain amā disisnamak are, amā el fiya mafenēdidig. Amā darau difanamak are, darau anī faali mafedig. <sup>13</sup>Bouwamā bun od duk sain, amā molol nem od solo mafedig. Mabodok masi gama sain enei bun, amā teneub enei nē ido gen ado, ereb ereb ganan nē moto gen wō maun.

<sup>14</sup>Aya ā mama ifeneīya nigin enei to atotof, anī ere, ā neu kesu tar oboiyou gen wedereī arouf nigin age afef. <sup>15</sup>Ere nigin, Kristus bun, ā ten tausen kulat tamo ado, anī ere, ā temeī musei sã, are aya Kristus Jesus bun biya od bunem temeī wō aun. <sup>16</sup>Anī nigin, aya ā madē wiyagauf nigin total bagai arokeneik. <sup>17</sup>Gariya enei nigin, aya neu kesu Timoti, ĩ Odug bun aya oboiyou ado dō fiya biya, ā gein sur afef. Im Kristus Jesus bun, neu mata ibodōya nē suma anī, ā wedereī fokō fouf, are aya modou ganan sios ganan bun afelnēdidig age fiya bagai.

<sup>18</sup>Ā tunī, Pol ĩ amā garan to isiyouf ge fen, ā aug yeneī walesegen. <sup>19</sup>Anī ere, Odug orouf are, aya kaisā bagai ā gein asiyouf, age afe fen, aya dogo yeneid yaleseya tamo eneidi naig de wogō def anī sã, anī ere, ereb megeir idi ado anī fele afouf. <sup>20</sup>Ere nigin, Negur nē tano are ege wogōya nē sã, are megeir nē. <sup>21</sup>Ere anī ā oroyeik? Aya wagagā yeīya nigin tibog ado ā gein asiyouf de, wau laa fiya ado molol bunem asiyouf?

### Turei Noli Tobonunā Ado Walelnēgouf!

**5** <sup>1</sup>Ā atun, noli tobonunā age fiya, are haiden atuneg to wō yedig anī, ibodok yeya karī aun. Tamo taka ī tama nē kayau we fedig. <sup>2</sup>Age fe di, ā aug selī wabigedig! Age fiya ban, ā wauī gudūf fen, tamo tobonunā enei inof anī, āgenei uyu kū fiya bun walelnēgouf, are deuf. <sup>3</sup>Aya bouwau ā geid to ibodok, anī ere, uur bun are, aya ā geid tabodok. Aya ā geid ibodōya gen, tamo enei age fen, are ī mogo es afiyen. <sup>4</sup>Ā neda Odug Jesus yana bunem guru gouf bun, aya uur bun ā geid tabodōf, are neda Odug Jesus nē megeir ibodōf sain bun, <sup>5</sup>tamo enei Satan ima bun unenēg, anī bunem, mosor nē bouwa daūf iraile fen, Odug nē naa bun yogon uur isennēya yalouf.

<sup>6</sup>Ā yenei yaleseya are to biya. Yis naal bagai flawa obu namen kabī yaledig anī, ā to keleī de? <sup>7</sup>Ā flawa mata yis sā gen wō gouf nigin, yis tubu anī waleleg, are ā anī flawa mata yis sā. Ere nigin, Kristus, neda Pasa naa nē sipsip naal, sesewi difiyen. <sup>8</sup>Anī nigin, ada Pasa Sifa naa anī tarouwauf, are yis tubu, sesen ado to biya nē yis bunem sā, anī ere, bret yis sā, karētut ado momoi nē bret bunem age tafouf.

<sup>9</sup>Aya ā noli tobonunā dinodig tamo kayau geid to nigal gouf nigin, neu pas mogo atokenein, <sup>10</sup>anī ere, aya teneub enei nē tamo kayau geid to nigal gouf nigin to orok, are idi noli tobonunā, ereb ereb nigin akorouya, idegēya bunem taka nē safina bē yaleya be, idegēya waitou yana yaleseya age difedig. Ā idi geid to nigal gouf are, ā teneub enei utorōgouf. <sup>11</sup>Anī ere, gama aya ā bun atotof are, ā taka ī yogo nigin tura ye fen, noli tobonunā, ereb ereb nigin akorouya, idegēya waitou yana yaleseya, bou yūya od wogōya, naan yōya be, idegēya bunem taka nē safina bē yaleya age fedig, ī weim to nigal gouf. Tamo age fiya ado weim saafeg to wāgauf.

<sup>12</sup>Ere nigin aya idi sios mayarē difaref anī es afediyouf? Are, idi sios namen difaref anī ā to es wiyēdigef de? <sup>13</sup>Negur idi sios mayarē difaref anī es fediyouf. Are Negur nē Itotoya bun eig ye irok kilei, “Ā atun tamo sane anī walelnēgouf.”<sup>g</sup>

### Momoiya Tamo Kayau Atun Kot Fiya

**6** <sup>1</sup>Āgenei takam, taka ado fefuya yenēf are, ere nigin ī Negur nē tamo kayau wagedin irouleya ban, ī idi momoiya sā anidi bun, mama sā gen es fiya nigin irouledig? <sup>2</sup>Are Negur nē tamo kayau teneub enei es difouf anī, ā to keleī de? Ā teneub enei es gouf are, ā morō naal bagai es fiya nigin kisi feleya sā de? <sup>3</sup>Are amā engel es mafediyouf anī, ā to keleī de? Age fouf are, mata ibodōya enei nē morō es fiya nigin naig fiyauf?

<sup>g</sup> 5:13 Diuteronomi 17:7; 19:19; 21:21; 22:21, 24; 24:7

<sup>4</sup>Anī nigin, ā teneub enei nē morō age fediya nigin fefuya adouf are, ā haiden idi, sios bun tamo yeneid sã anidi, es fiya tamo nigin ugirnēdigedig de? <sup>5</sup>Aya ā mama yeif nigin od enei orok. Are ā atun, momoiya tamo kayau fefuya idi atun ibodok anī, es fiya nigin kisi biya ado tamo taka sã de? <sup>6</sup>Anī ere, momoiya tamo takam tura taka kiwai ifen ken, kot bun iledig, are enei momoiya sã anidi wagedin irouledig.

<sup>7</sup>Momoi bagai, ā atun abob nigin kot bun fefuya ibodok anim, ā mogo kuku gen anī yaoref. Ere nigin ā idi to utornēdige di, sane diyeif? Ere nigin ā idi to utornēdige di, didegneif? <sup>8</sup>Age fiya ban, ā aug udegēg fen, sane ago gedig, are ā turei tar bun enei ago gedig.

<sup>9</sup>Tamo tobonunā sesen idi, Negur nē tano to akorouf anī, ā to keleī de? Are ā idi to utornēdige di, didegneif. Idi noli tobonunā dinodig, idi idegēya waitou yana dalesedig, idi seseirā tobonunā dinodig, tamo idi bouweid na nē sur difedig, tamo tutur, kayau tutur noli tobonunā dinodig, <sup>10</sup>idi bē daledig, idi erēb erēb safina nigin akorou dedig, idi naan dōdig, idi bou yūya od wogō dedig, idi idegēya bunem taka nē safina daledig anidi ganan, Negur nē tano to akorouf. <sup>11</sup>Are ā tunī age fiya anī ago gedig. Anī ere, ā mosor bun tamal kulo yein, are ā fateul inenein, are ā, Odug Jesus Kristus yana bun ado neda Negur nē Awa Uur bunem, Negur mala bun madur bagai wowā gen.

### Noli Tobonunā

<sup>12</sup>Taka irōf, “Aya erēb erēb ganan nigin sã age afeid kisi feleya.” Are de momoi, anī ere, erēb erēb ganan to isennadauf. Aya erēb erēb ganan nigin sã age afeid kisi feleya, anī ere, aya erēb takam to irouna di, ferfer abodōf. <sup>13</sup>Taka irōf, “Saaf are te guroub nē, te guroub are saaf nē.” Anī ere, Negur anī ganan daū falauf. Bouwa are noli tobonunā nē sã, anī ere, Odug nē, are Odug ī bouwa anī nē. <sup>14</sup>Are, Negur yogon megeir bunem Odug laa bun tamal yalesnen, are adag ī yalesnadauf. <sup>15</sup>Ā bouweī are, Kristus yogo bouwa nē tunī anī ā to keleī de? Age fiyauf are, aya Kristus bouwa nē tunī ale fen, kayau bouwa na sur fedig ado bagu afouf de? Sã bagai! <sup>16</sup>Tamo ī yogo, kayau taka bouwa na nē sur fedig ado bagu difouf are, ī kayau anī ado bouwa tekelei youf anī, ā to keleī de? Ere nigin, Negur nē Itotoya bun eig ye irok, “Idi urom bouweid tekelei youf.”<sup>h</sup> <sup>17</sup>Anī ere, taka ī yogo Odug ado bagu difouf are, ī uur bun Odug ado tekelei youf.

<sup>18</sup>Noli tobonunā bun tamal uyagauf. Mosor tunī ganan tamo taka inof, are ī yogo bouwa serē inof, anī ere, taka ī yogon bouwam noli mosor inof, are ī yogo bouwa bun mosor inof. <sup>19</sup>Ā bouweī are Awa Uur Fateul nē tempel, Awa Uur Fateul are ā namein ibodok anī Negur bun tamal

<sup>h</sup> 6:16 Jenesis 2:24

walegen are, ā to keleĩ de? Ā aug, āgenei sã, <sup>20</sup>ere nigin, ā mala odugem na yaleyein. Anĩ nigin, bouweĩ anim Negur yana walesagauf.

### Tamo Kayau Ado Bagu Fiya Nigin

**7** <sup>1</sup>Gama od anĩ ā utotogen nigin arokeneik, tamo ĩ kayau to yalouf, are deuf. <sup>2</sup>Anĩ ere, noli tobonunã musei bagai ibodok nigin, are tamo mugu mugu ĩ yogon kayau adouf, are kayau mugu mugu ĩ yogon tamo adouf. <sup>3</sup>Tamo ĩ yogon bouwa nigin, yogon kayau to katũ fiyēf, age fiya gen, kayau ĩg yogon bouwa nigin yogon tamo to katũ fiyēf. <sup>4</sup>Kayau ĩ yogon bouwa nē mudur to ibodōf, are yogon tamo nē, age fiya gen, tamo ĩ yogon bouwa nē mudur to ibodōf, are yogon kayau nē. <sup>5</sup>Ā abob nigin bouweĩ to katũ gouf, anĩ ere, ā kosē gouf nigin, sain naal bagai yo ge fen, bouweĩ katũ gouf, are kisi falouf. Agog fen, ā bouweĩ kulatun fiya anĩ, malai nigin, are Satanem to kisi yeif nigin, baban ā bouweĩ bagu gouf. <sup>6</sup>Aya od enei karĩ gouf nigin orok, are itãfiya sã. <sup>7</sup>Tamo ganan aya gen dibodok, are aya orouf. Anĩ ere, tamo mugu mugu idi, Negur bun dogo neid ege luwa dalef, taka ege luwa enei, taka ege luwa anĩ.

<sup>8</sup>Anĩ ere, aya kayau tamo yaleya sã, tamo kayau yaleya sã ado, waab arokenēdif, are idi aya gen age de dibodok dilauf, are deuf. <sup>9</sup>Anĩ ere, idi dogo bouweid nigin kulatun fiya kisi feleya sãf are, tamo idi kayau dalouf, kayau idi tamo dalouf, ere nigin, noli kisi waud bun yã gen bobo reya anĩ ban, tamo idi kayau yaleya, kayau idi tamo yaleya are deuf.

<sup>10</sup>Tamo idi kayau adodo, kayau idi tamo adodo bun, aya od enei arokenēdif, are ayam sã, Odugem. Are kayau ĩ ne tamo to itornēf. <sup>11</sup>Anĩ ere, kayau ĩ tamo itornēf are, ĩ tamo taka to yalouf be, are ĩ yogon tamo ado komo difouf. Are tamo ĩ yogon kayau to iru irailouf.

<sup>12</sup>Ā tunĩ ganan bun, aya od enei arokenēdif, are ayam, Odugem sã. Tura taka ĩ kayau ado, are kayau ĩ momoiya sã, anĩ ere, ĩ tamo ado ibodōya nigin oro fouf are, tamo ĩ kayau anĩ to iru irailouf. <sup>13</sup>Kayau taka ĩ tamo ado, are tamo ĩ momoiya sã, anĩ ere, ĩ kayau ado ibodōya nigin oro fouf are, kayau ĩ tamo anĩ to iru irailouf. <sup>14</sup>Ere nigin, tamo momoiya sã ĩ, yogon kayau bunem fateulen, are kayau momoiya sã ĩ, yogon momoiya tamo bunem fateulen. Age fiya sãf are, ā gereĩ tar idi karētut to dibodōf. Anĩ ere, idi gama fateul dibodok.

<sup>15</sup>Anĩ ere, taka ĩ momoiya sã, iyawau fenē nigin oro fouf are, utornēge di, age fouf. Suma age fiya bun, momoiya tamo be kayau, ereb taka anim to katĩ fiyek. Are Negur ĩ ada wau inosiya bun tabodōf nigin iweignadan. <sup>16</sup>Kayau ō, nē tamo usennēf be sã be anĩ, naig fe di, ō keleĩ youf? Tamo ō, nē kayau usennēf be sã be anĩ, naig fe di, ō keleĩ youf?

<sup>17</sup>Odug ada mugu mugu igirnadan kilei ado, Negur ada mugu mugu iweignadan kilei bagai, age tag, mata tabodōgouf. Are, aya sios ganan bun nun enei anof. <sup>18</sup>Sain Negur ĩ tamo taka iweignen, tamo ĩ mogo



mulū ilen de? Are tamo ī mulū ileyā sã to ilauf. Sain Negur ī tamo taka iweignen, tamo ī mulū ileyā sã de? Are tamo ī to mulū ilauf. <sup>19</sup>Mulū ileyā are ege, mulū ileyā sã areg ege. Anī ere, Negur nē itāfiya dō fiya anī odug bagai. <sup>20</sup>Tamo mugu mugu ī Negur iweignen sain bun, ī ibodon suma anī bun, agef ibodōf. <sup>21</sup>Sain Negur ī iweignon, ō ferfer ubodon de? Ō anī nigin to morō yōf, anī ere, ō ferfer itorōya nigin kisi falauf are, anī ō agouf. <sup>22</sup>Ere nigin, taka ī, Odugem iweignen sain bun, ferfer ibodon, ī Odug nē karika tamo ibodok, age fiya gen, taka ī iweignen sain bun, karika tamo ibodon, ī Kristus nē ferfer ibodok. <sup>23</sup>Ā mala odugem na yaleyēin. Ā tamo neid ferfer to wowā gouf. <sup>24</sup>Turau tar, tamo mugu mugu ī Negur iweignen sain bun ibodon suma anī bun, agef Negur ado dibodōf.

<sup>25</sup>Kayau taulei nigin, aya Odug bun tamal itāfiya taka to alen. Anī ere, aya, taka ī Odug nē wau yūya bunem momoi bagai tamo wō yen anī, aya neu kisi afeneik. <sup>26</sup>Gama enei nē morō odug nigin, aya kisi afef, are tamo ī gama ibodok gen, agef ibodōf, are deuf. <sup>27</sup>Ō kayau ado de? Age fiyauf are, ō kayau iru iraileyā nigin naab to umirēf. Ō kayau to walēn de? Age fiyauf are, ō kayau taka yaleyā nigin to umirēf. <sup>28</sup>Anī ere, ō kayau walef are, ō mosor to unof. Kayau taulei taka tamo yalef are, ī mosor to inof. Anī ere, tamo kayau dalef, kayau tamo dalef, idi mata ibodōya enei bun morō musei dalouf, are aya morō enei ā bun to wō youf anī orouf.

<sup>29</sup>Turau tar, aya od enei arokeneik, are sain mogo tobegaf, anī nigin, gama sain enei ilef bun, idi kayau ado, idi kayau sã gen dibodōf; <sup>30</sup>idi maruid isif, idi to maruid isif gen dibodōf; idi waud al difef, idi waud to al difef gen dibodōf; idi ereb taka na dalef, idi ereb taka sã gen dibodōf; <sup>31</sup>idi teneub enei nē safina diroudif, are idi waud adok anī bun to dinouf. Ere nigin, teneub enei, gama agef ibodok anī, inakalauf.

<sup>32</sup>Aya ā to suwē gouf nigin orouf. Tamo kayau sã, ī Odug nē kabī nigin kisi fedig, are ī ereb age fe di, Odug al fouf nigin kisi fedig. <sup>33</sup>Anī ere, tamo kayau ado, ī teneub enei nē bouwa isennēya nigin kisi fedig, are ī ereb age fe di, yogon kayau al fouf nigin kisi fedig. <sup>34</sup>Age fe di, yogon kisi fara fedig. Kayau tamo sã be, kayau taulei, ī Odug nē kabī nigin kisi fedig, are ī bouwa ado uur bun fateul wō youf nigin age fedig. Anī ere, kayau tamo ado, ī teneub enei nē bouwa isennēya nigin kisi fedig, are ī ereb age fe di, yogon tamo al fouf nigin kisi fedig. <sup>35</sup>Aya od enei āgenei biya fiya nigin orok, aya ā ifōyēif nigin to age afef, anī ere, ā madur agog fen, ā aug nigin Odug bun fara fiya sã wenēgouf nigin age afef.

<sup>36</sup>Anī ere, tamo taka ī, kayau taulei yaleyā nigin digirnen anī, ī bun tobonunā biya sã age afef ye fen, kayau ī tamo yaleyā nē sain mogo wal fe di, tamo ī kayau yaleyā nigin kisi fef are, tamo ī yogon oroya kilei age fouf. Ī mosor to inof, are idi bagu difouf. <sup>37</sup>Anī ere, tamo ī yogon wau bun total ifar fen, taka nē kisim to we fiyēf, anī ere, yogon oroya dōf fen, kayau taulei anī to yalouf nigin yogon kisi ifōf are, areg ī tutuk age fouf.

<sup>38</sup>Anī nigin, tamo ī kayau taulei yalef are, ī tutuk age fef, anī ere, tamo ī kayau to yalef are, ī tutuk bagai age fef.

<sup>39</sup>Kayau ī yogon tamo fau mata ibodōf are, ī yogon tamo ado dibodōf. Anī ere, yogon tamo laa foug are, ī yogon oroya dōf fen, taka bun ileyā kisi feleya, anī ere, tamo ī Odug nigin momoi yef anī bun dogol. <sup>40</sup>Anī ere, neu es fiya bun, kayau ī gama ibodok gen, ibodōf are, ī fatuk bagai al foug. Aya kisi afef, are ayag Negur nē Awa Uur ado.

### Saaf Idegēya Waitou Bun Sesewi Difen

**8** <sup>1</sup>Gama, saaf idegēya waitou bun sesewi difedig nigin, ada keleī, are ada ganan keleī ado. Keleī are yogo yana yalesedig. <sup>2</sup>Tamo ī ereb taka nigin aya keleī yef are, ī ereb taka keleī youf anī ī fau keleī sā. <sup>3</sup>Anī ere, tamo ī Negur nigin wau laa fef are, Negur ī nigin keleī.

<sup>4</sup>Anī nigin, saaf idegēya waitou bun sesewi difedig anī yōya nigin, ada keleī, are tenebur ein idegēya waitou are ege, anī ere, Negur taka sā, tekelei dogol ibodok. <sup>5</sup>Ere nigin, saa be teneub bun, idi waitou dedig anī dibodok, are momoi bagai waitou musei ado odug musei dibodok, <sup>6</sup>anī ere, ada bun Negur tekelei dogol ibodok, are Dei, ī bun tamal ereb ereb ganan wō yen, ī nigin ada mata tabodok. Odug tekelei dogol ibodok, are Jesus Kristus, ī bunem ereb ereb ganan wō yen, ī bunem ada mata tabodok.

<sup>7</sup>Anī ere, tamo ganan enei keleī sā. Tamo kayau tunī fau idegēya waitou nigin fatuk bagai kisi difedig nigin, sain idi saaf anī doko, idi saaf anī idegēya waitou bun sesewi difen de fen, kisi difedig, age dife di, idi waud total sā nigin, amuyēdig. <sup>8</sup>Anī ere, saafem ada Negur non to irouladauf, are ada saaf to tāf are, anim ada to daū fadauf, ada saaf tāfeg, anim ada to isennadauf.

<sup>9</sup>Anī ere, ereb ā karika ago gouf anim, idi momoiya total sā anidi bun, naabura gudū fiya to wenēdigouf nigin lo walagauf. <sup>10</sup>Ere nigin, taka ī wau total sā anī, ō keleī enei ado, idegēya waitou nē tempel bun saaf wō mog ileyōf are, ī saaf idegēya waitou bun sesewi difen anī, kumī sā to yāf de? <sup>11</sup>Anī nigin, turā total sā, ī nigin Kristus laa fen, are ogon keileim ī daū fiyek. <sup>12</sup>Sain ā naab enei bun tureī tar bun mosor unog fen, dogo neid waud total sā anī daū wedigef are, ā Kristus bun mosor unogef. <sup>13</sup>Anī nigin, ereb aya āf anim neu turau mosor bun inenēf are, ayam ī mosor bun to anenēf nigin, aya muda baban to bagai āf.

### Aposel Ereb Yaleya Nigin Kisi Feleya

**9** <sup>1</sup>Ereb takam aya katī fiyaf de? Aya aposel sā de? Aya Jesus neda Odug to ailen de? <sup>2</sup>Ā Odug bun neu kabī bunem to wō gen de? <sup>2</sup>Tunī bun aya aposel sā be, anī ere, momoi bagai aya ā bun aposel. Ere nigin, ā Odug bun aya aposel kabī alef anī nē uris.

<sup>3</sup>Idi aya es difiyauŋ nigin dibodok anidi bun, isennaya od enei orok. <sup>4</sup>Amā saaf ado naan yōya nigin to kisi feleya de? <sup>5</sup>Amā, aposel tunī ganan, Odug nē tura tar ado Pita age difedig gen, kayau momoiya ado amā geid marou malouf, are to kisi feleya de? <sup>6</sup>Takag, aya ado Banabas dogol mata ibodōya nigin kabī malouf de?

<sup>7</sup>Aim kusī tamo kabī yale fen, yogo nigin ereb ereb na yaledig? Aim wain kabier wain iten ken, dogo neid biya to yōdig? Aim sipsip lof fen, dogo neid su sumin to yōdig? <sup>8</sup>Aya tamo nē lo fiya bunem dogol, od enei orok de? Lo anīg enei nigin tekelei bagai to irok de? <sup>9</sup>Ere nigin, Moses nē Lo bun eig ye itoton, “Ō bulmakau, wit faat biya nē gabar loko fediyouf nigin lalai feid mog, yogon awa to ufokalauf.”<sup>i</sup> Negur ī bulmakau nigin kisi fef de? <sup>10</sup>Momoi, Negur ī od enei ada nigin to irok de? Momoi, od enei ada nigin itoton, ere nigin, tamo teneub gudū fedig ado, tamo wit faat biya nē gabar yaleledig, idi kusu fiya sain bun dogo neid morou morou dalouf nigin waud ise fen, age difedig. <sup>11</sup>Amā ā atun āgenei uur nigin faat mararan ouf are, amā ā bun bouwa buru nē safina kusu mafouf are, anī odug biya de? <sup>12</sup>Tunī ā bun isennēya enei yaleya nigin kisi falauf are, amā idi wal fiya anī, to malouf de?

Anī ere, amā ā bun safina yaleya nigin kisi feleya enei to age mafen. Age fiya ban, amā Kristus nē biya od to naabura gudū mafouf nigin, ereb ereb ganan faali mafef masin. <sup>13</sup>Idi tempel bun kabī daledig anidi, dogo neid saaf tempel bun daledig, idi alta bun aruna daledig anidi, ereb alta bun sesewi difen anī dale dogoledig, are ā to keleī de? <sup>14</sup>Naab tekelei anī bun, Odug iron, are idi biya od wogō def anidi, biya od bunem mata ibodōya nē safina dalouf.

<sup>15</sup>Anī ere, aya safina yaleya nigin kisi feleya eneidi, anī taka to age afen. Age afe fen, aya, ā aya nigin ago gouf nigin, enei to atotof. Takam yanau yaleseya enei aya bun yalelauf are, aya laa fiyauf anī orouf. <sup>16</sup>Aya biya od wogō auf sain bun, aya yug nigin yanau to alesedig, ere nigin, Negurem biya od wogō auf nigin nugo fiyadig. Aya biya od to wogō auf are, aya bun morō odug bagai wō youf. <sup>17</sup>Aya neu oroya bunem kabī enei alouf are, aya mala yaleya kisi feleya. Are neu oroyam sā, anī ere, aya Negurem kabī ifanan nigin age afef. <sup>18</sup>Age afouf are, ere anī neu mala solo? Are, sain aya biya od wogō auf, aya mala yaleya sā biya od wogō audig, are aya biya od bun mala yaleya nigin kisi feleya anī to age afedig.

<sup>19</sup>Aya tamo taka nē sā, are aya karika, anī ere, aya tamo musei kisi feleya bagai gei afouf nigin, aya yug tamo ganan nē ferfer wō auf. <sup>20</sup>Juda idi bun, aya Juda idi gei afouf nigin, Juda tamo gen wō aun. Idi lo farumen dibodok anidi bun, aya yug lo farumen to abodok, anī ere, aya idi lo farumen dibodok anidi gei afouf nigin, aya tamo lo farumen ibodok

<sup>i</sup> 9:9 Diuteronomi 25:4

gen wō aun. <sup>21</sup>Idi lo sã anidi bun, aya Negur nē lo bun karika sã, are aya Kristus nē lo farumen abodok, anī ere, aya idi lo sã anidi gei afouf nigin, aya tamo lo sã gen wō aun. <sup>22</sup>Idi furūya anidi bun, aya idi furūya anidi gei afouf nigin, aya tamo furūya gen wō aun. Aya ereb ereb ganan kisi feleya anī bunem, tunī kel gei afouf nigin, tamo ganan bun, idi dibodok gen tobonunã age fiya gen wō aun. <sup>23</sup>Aya biya od nigin enei ganan age afedig, are aya biya od nē el fiya weim talouf nigin.

<sup>24</sup>Gududuya bun, tamo ganan gududu dedig, anī ere, tekeleim dogol mala yaledig anī ā to keleī de? Naab age fiya bun, gududu ge fen, mala walougouf.

<sup>25</sup>Tamo ganan kodē wal difouf nigin age difedig anidi, ereb ereb ganan bun totol bagai tai difedig. Idi mala fau sa kalauf anī dalouf nigin age difedig, anī ere, amã mala gai gai ibodkalauf anī yaleya nigin age mafedig. <sup>26</sup>Anī nigin, aya tamo gariya sã gudu redig gen, to gudu raudig. Aya yau yūdig gen, to ege imau warū yeledig. <sup>27</sup>Anī ere, aya yug bouwau au ken, anī neu ferfer ibodōf nigin age afedig, are aya tunī wogō afiyeīd fen, aya yug mala solo yaleya nigin, kisi feleya sã to bagai wō auf nigin age afedig.

### Israel Neid Tubuid Tar Bun Weder Irouya Od

**10** <sup>1</sup>Turau tar, aya ā enei to keleī youf nigin to orouf, are Moses nē sain bun, tubuda tar ganan budū farumen difar fen, idi ganan Maaī Giriya atu diyok dilen. <sup>2</sup>Idi ganan budū bun ado maaī bun naan dale fen, Moses nē ibor tar wowā den. <sup>3</sup>Are, idi ganan uur nē saaf tekelei anī don, <sup>4</sup>idi ganan uur nē naan tekelei anī don, are uur nē meein idi geid weim diyok dilen anī bun, idi naan don, meein are Kristus. <sup>5</sup>Anī ere, Negur ī idi musei ganan nigin wau to al fen, anī nigin, dogo neid bouweid gerere tuan firagagaū difen.

<sup>6</sup>Enei ganan ada wederada irouya nigin wō yen, anī bunem ada idi age difen gen, ereb sane nigin wauda to tanouf. <sup>7</sup>Idi neid tunī gen, ā idegēya waitou yana to walesagauf. Are Negur nē Itotoya bun eig ye irok, “Tamo kayau saaf naan doko dibod ken, fafā de dale, noli tobonunã dinon.”<sup>j</sup>

<sup>8</sup>Ada idi tunī age difen gen, noli tobonunã to tanouf. Age dife di, naa tekelei bun, idi atun tuwenti tri tausen tamo kayau gare den. <sup>9</sup>Ada idi tunī age difen gen, Odug kisi fiya bun to tanenēf. Idi age difen, gogourum didenkesin. <sup>10</sup>Ada idi tunī gen, to nauseir tauf. Idi age difen, daū fiya nē engelem idenkesin.

<sup>11</sup>Eneidi ada ifelnadauf nigin idi bun wō yen, are idikeleya sain, ada bun mogo wō yen anī bun, wederada irouya nigin itoton. <sup>12</sup>Anī nigin, taka ī kisi fef, totol ifaref yef, ī to kubū youf nigin lo falauf. <sup>13</sup>Kisi fiya

<sup>j</sup> 10:7 Eksodas 32:6

ganan ā bun wō yedig, are tamo bun wō yedig dogol. Anī ere, Negur ī age afouf yef anī, age fedig, ī kisi fiya ā yaleya kisi feleya sā anī, ā bun to wō youf nigin age fouf. Anī ere, ā kisi yeif sain bun, Negur ī iyawoya nē naab anīg ifelneif, anī bunem ā total ufaragauf nigin sā kisi falauf.

### Saaf Idegēya Waitou Bun Dinon Ado Odug Nē Saaf

<sup>14</sup>Anī nigin, neu turau tar oboiyou, idegēya waitou yana yaleseya bun tamal uyalalagauf. <sup>15</sup>Aya ā tamo kayau kisi biya ado gen arokeneik, ereb aya arok anī, ā aug es gouf. <sup>16</sup>De fiyēya nē kap, ada de fiya tafenedig, are Kristus nē naud bun bagu fiya sā de? Bret ada mumā tafedig, are Kristus nē bouwa bun bagu fiya sā de? <sup>17</sup>Bret tekelei dogol ibodok nigin, ada musei, anī ere, bouwada tekelei, ere nigin, ada ganan bret tekelei anī bun bagu tafedig.

<sup>18</sup>Israel tamo kayau nigin kisi walogouf, idi sesewi fiya nē saaf dōdig anidi, alta bun to bagu difedig de? <sup>19</sup>Age fouf are, ere anī kisi afef, are sesewi fiya nē saaf idegēya waitou difenek anī odug de, oo idegēya waitou anī odug de? <sup>20</sup>Sā, anī ere, haiden neid sesewi fiya anī kaa sesen bun difenedidig, are Negur bun sā. Are aya ā kaa sesen geid bagu gouf nigin to orouf. <sup>21</sup>Ā Odug nē kap bun ado kaa sesen neid kap buneg yōya nigin kisi feleya sā. Ā Odug nē tebol bun ado kaa sesen neid tebol buneg bagu fiya nigin kisi feleya sā. <sup>22</sup>Ada Odug kiyei ifanadauf nigin age tafef de? Ada neda megeir ī wal fiya de?

### Momoiya Tamo Kayau Neid Tobonunā

<sup>23</sup>Tunī dirōdig, “Ada ereb ereb ganan nigin, sā age tafeid, age fiya nigin kisi feleya,” anī ere, ereb ereb ganan to isennadauf. Tunī dirōdig, “Ada ereb ereb ganan nigin, sā age tafeid, age fiya nigin kisi feleya,” anī ere, ereb ereb ganan biya fiya to inouf. <sup>24</sup>Taka ī yogon biya fiya nigin to imirēf, anī ere, tunī neid biya fiya nigin imirēf.

<sup>25</sup>Ereb ereb yaro maket bun na sur difedig anī, āgenei kisi bun to fiya sā wāgauf, <sup>26</sup>ere nigin, “Teneub ado ereb ereb ganan anī namen yenek are Odug nē.”<sup>k</sup>

<sup>27</sup>Momoiya sā tamo taka, saaf yōya nigin ā iweignei di, ā ileya nigin oroyeif are, ereb ereb ā meleī bun inodin anī, āgenei kisi bun to fiya sā wāgauf. <sup>28</sup>Anī ere, taka ī ā irokeneif, “Enei are sesewi fiya bun difenen,” youf are, tamo irokenein ī nigin ado kisi es fiya yaor karētut ibodōf nigin, saaf anī to wāgauf. <sup>29</sup>Neu wogōya nē gariya are, tamo anī nē kisi es fiya nigin, are āgenei kisi es fiya nigin sā. Taka nem irōf, “Age fiyauf are, ere nigin neu ereb ereb nigin kisi feleya anī, tamo taka nē kisim es fouf? <sup>30</sup>Aya de fiya bunem saaf āf are, ere nigin taka nem saaf anī nigin, Negur de afiyek nigin bou yūya od irok?”

<sup>k</sup> 10:26 Sam 24:1

<sup>31</sup>Anĩ ere, ã saaf wāgauf, naan wāgauf ado, ereb ereb ganan ago gouf are, Negur nē fula fiya medeīya nigin anĩ ganan ago gouf. <sup>32</sup>Juda tamo, Grik tamo be, Negur nē sios bun tamo taka, to ye tū foug nigin ago gouf. <sup>33</sup>Ayag naab ganan bun tamo ganan al afiyēdiyof nigin age afedig gen, ago gouf. Ere nigin, aya neu biya fiya to amirek, anĩ ere, musei isennēdiyof nigin, dogo neid biya fiya amirek.

**11** <sup>1</sup>Ayag Kristus madē afiyēdig gen, ã aya madē wiyagauf.

### Negur Yana Yaleseya Bun Mudur Kerū Fiya

<sup>2</sup>Aya ã yeneĩ alesef, ere nigin, ã ereb ereb ganan bun aya nigin karĩ weleg fen, ifelnēya anĩ aya ale fen, ã afenein anĩ, kafĩ weleg uroug usigef.

<sup>3</sup>Anĩ ere, aya ã eig fiya anĩ keleĩ youf nigin orouf, are tamo ganan neid mudur are Kristus, kayau nē mudur are tamo, Kristus nē mudur are Negur. <sup>4</sup>Tamo ganan, taka ĩ yogon mudur kerū fel fen, kosē yef be, profet od wogō yef, ĩ yogon mudur Kristus mama ifenek. <sup>5</sup>Kayau ganan, taka ĩ yogon mudur to kerū fel fen, kosē yef be, profet od wogō yef, ĩ yogon mudur, are aiwa anĩ mama ifenek, are ĩ yogon fatiya korerē feleya gen. <sup>6</sup>Kayau taka ĩ yogon mudur kerū fiya sãf are, ĩ yogon fatiya gudū falauf. Kayau taka ĩ yogon fatiya gudū foug be, korerē foug anim, mama ifenēf are, ĩ yogon mudur kerū foug. <sup>7</sup>Tamo taka ĩ yogon mudur to kerū foug, ere nigin, ĩ Negur nē malakanon ado fula fiya medeīya, tamo bun. Anĩ ere, kayau ĩ tamo nē fula fiya medeīya, kayau bun. <sup>8</sup>Ere nigin, tamo ĩ kayau bunem to isin, anĩ ere, kayau ĩ tamo bunem isin. <sup>9</sup>Takag, tamo ĩ kayau isennēf nigin to inon, anĩ ere, kayau ĩ tamo isennēf nigin inon. <sup>10</sup>Age fiya nigin, kayau ĩ, engel idi neid meleid bun, ĩ tamo farumen ibodok anĩ ifelnēdiyof nigin, yogon mudur kerū foug.

<sup>11</sup>Anĩ ere, Odug bun kayau ĩ tamo bun yogo mugu to ifaref, tamo ĩg kayau bun yogo mugu to ifaref. <sup>12</sup>Ere nigin, kayau ĩ tamo bunem isin gen, tamo ĩg kayau bunem wō yen. Anĩ ere, ereb ereb ganan Negur bun tamal isif. <sup>13</sup>Ā aug es gouf, are kayau taka ĩ yogon mudur to kerū fel fen, Negur kosē fiyek, are de de? <sup>14</sup>Tamo taka fatiya salo isiya adouf anim mama ifenek anĩ, tamo nē tobonunã anĩ to ifelneik de? <sup>15</sup>Anĩ ere, kayau taka ĩ fatiya salo isiya adouf, are yogon fula fiya medeīya. Ere nigin, fatiya salo isiya are, yogon mudur kerū fiya nigin ifenen. <sup>16</sup>Anĩ ere, taka ĩ od enei kiwai ifenēf are, ada suma taka sã, Negur nē sios buneg suma taka sã.

### Odug Nē Saaf

*(Matyu 26:26-29; Mak 14:22-25; Luk 22:14-20)*

<sup>17</sup>Faded fiya dō fiya enei bun, aya ã yeneĩ to alesef, ere nigin, āgenei guru fiya biya anĩ fotokar sane isidig. <sup>18</sup>Uruwa bun, aya karĩ aun, are ã sios nigin guru gef ã atun, fara fiya yenēdig, age afe fen, od tunĩ aya

momoi auf. <sup>19</sup>Ā atun fara fiya bagai yenek, anī bunem, ā atun ai anī Negur yo fiyen anī ifelneif. <sup>20</sup>Anī nigin, sain ā guru gef, are Odug nē Saaf bagai anī to wōgedig, <sup>21</sup>ere nigin, sain ā saaf wōgef bun, ā abob tari fediya sã, mugu mugu saaf wōgedig, anī nigin, taka ī naū ibodōdig, taka ī naan yōdig. <sup>22</sup>Saaf ado naan yōya nigin ā fō sã de? Ā Negur nē sios lai ge fen, idi safina sã anidi mama wenēdigef de? Aya ā ere ayeif? Aya enei nigin ā yeneī alesauf de? Sã bagai! Aya enei nigin ā yeneī to alesauf.

<sup>23</sup>Ere nigin, aya enei Odug bun tamal ale fen, āg afenein. Are Odug Jesus, Judas ī kiwai ifenen bō anī bun, bret yale, <sup>24</sup>Negur de fiye ken, bret anī mumāf fen, iron, “Enei neu bouwau, are ā nigin. Aya nigin karī walagauf nigin enei ago gouf.” <sup>25</sup>Naab tekelei bun, bō saaf bure difel fen, ī kap yale fen, iron, “Kap wain enei neu naudou bun bar itenēya mata. Sain ganan ā wāgauf, aya nigin karī walagauf nigin enei ago gouf.” <sup>26</sup>Ere nigin, sain ganan ā bret enei wōg fen, kap enei bun wāgauf, ā Odug nē laa nigin kurō wesig mog, ī fau isiyouf.

<sup>27</sup>Anī nigin, taka ī tutuk sã bret anī yāf be, Odug nē kap bun yāf are, ī Odug nē bouwa ado naud bun mosor inouf. <sup>28</sup>Taka ī yogo nigin es fel fen, bret anī yoko, kap anī bun yāf. <sup>29</sup>Ere nigin, taka ī Odug nē bouwa nigin to kisif fen, bret yoko, kap bun yāf are, ī yogon es fiya anī yogo yoko. <sup>30</sup>Anī nigin, ā atun musei malegeid fen, dagi didig, āgenei tunī gare den. <sup>31</sup>Anī ere, ada nigin es tafouf are, ada es fiya bun to tabodōf. <sup>32</sup>Sain ada Odugem es fadauf, are ada Odugem madur fadauf, are ī teneub enei nē tamo kayau geid ada mosor ado to youf nigin age fouf.

<sup>33</sup>Anī nigin, neu turau tar, sain ā yōya nigin guru gouf are, ā abob nigin tari gouf. <sup>34</sup>Taka ī naū fouf are, ī fō bun yāf, anī bunem, sain ā guru gouf, ā es fiya bun to ulagauf.

Sain aya asiyouf, aya faded fiya tobol afeneif.

### Awa Uur Fateul Nē Ege Luwa

**12** <sup>1</sup>Turau tar, aya ā Awa Uur Fateul nē ege luwa nigin to keleī youf anī to orouf. <sup>2</sup>Ā keleī, sain ā haiden ubodōgen, naab fire fire bun ditonei ken, eweid ifofakeleya idegēya waitou bun, fō yeleya nigin dirou dileyein. <sup>3</sup>Anī nigin, aya ā arokeneik, are taka ī Negur nē Awa Uur bunem wogō yef, ī to irōdig, “Jesus sane lauf.” Takag, taka nem eig ye irōya kisi feleya sã, “Jesus ī Odug,” are Awa Uur Fateulem dogol.

<sup>4</sup>Ege luwa nigin fire fire dibodok, anī ere, Awa Uur anī tekelei. <sup>5</sup>Kabī gariya fire fire dibodok, anī ere, Odug tekelei. <sup>6</sup>Kabī nē megeir fire fire dibodok, anī ere, Negur tekelei ī, tamo ganan bun, kabī nē megeir ganan nigin kabī yaledig.

<sup>7</sup>Tamo ganan isennēdiyof nigin, tamo mugu mugu bun Awa Uur yaor fedig. <sup>8</sup>Taka bun Awa Uur bunem kisi biya nē od ifenek, taka bun Awa Uur tekelei bunem keleī nē od ifenek, <sup>9</sup>taka bun Awa Uur tekelei bunem



momoiya anī ifenek, taka bun Awa Uur tekelei anī bunem dagi el fiya nē ege luwa ifenek, <sup>10</sup>taka bun memelik inoya nē megeir ifenek, taka bun profet od ifenek, taka bun uur es fiya ifenek, taka bun od fire fire nem wogōya ifenek, taka bun od fire fire nem wogōya anī falei fiya ifenek. <sup>11</sup>Enei ganan Awa Uur tekelei dogol ī yogon kabī, ī yogon oroya dōf fen, tamo kayau mugu mugu anī ifenēdidig.

### Bouwa Tekelei, Fara Fiya Musei

<sup>12</sup>Bouwa anī tekelei, anī ere, bouwa anī fara fiya musei bunem inof. Yogon fara fiya ganan are musei, anī ere, idi bouwa tekelei dinof. Kristus īg age fiya. <sup>13</sup>Ere nigin, ada ganan, Juda tamo be Grik tamo, ferfer be kafī fiya sā tamo, Awa Uur tekelei bunem naan tale fen, bouwada tekelei wō taun, agef fen, ada ganan Awa Uur tekelei naan gen tokon, megeir talouf nigin ifanadan.

<sup>14</sup>Bouwa ī fara fiya tekeleim to inof, anī ere, fara fiya museim inof. <sup>15</sup>Ye ī, aya ima sā, anī nigin, aya bouwa nē tunī sā youf, anī ere, gariya anī bun ī aya bouwa nē tunī sā yeya kisi feleya sā. <sup>16</sup>Takag, weder ī, aya mala sā, anī nigin, aya bouwa nē tunī sā youf, anī ere, gariya anī bun ī aya bouwa nē tunī sā yeya kisi feleya sā. <sup>17</sup>Bouwa adok malauf are, nainenem karī wouf? Bouwa adok wederouf are, nainenem sumeī walouf? <sup>18</sup>Anī ere, momoi, Negur ī bouwa nē fara fiya, ī orof kilei bagai, mugu mugu ganan inenēdin. <sup>19</sup>Bouwa nē fara fiya anī ganan tekelei youf are, bouwa ī nain ibodōf? <sup>20</sup>Age fiya gen, bouwa nē fara fiya musei dibodok, anī ere, bouwa de tekelei.

<sup>21</sup>Mala ima to irokenēf, “Aya ō to orouf!” Are, mudur ye to irokenēf, “Aya ō to orouf!” <sup>22</sup>Age fiya ban, bouwa nē fara fiya tunī total sā tailedig anī sāf are, bouwa ibodōya kisi feleya sā. <sup>23</sup>Ada bouwa nē fara fiya yana sā gen tauf anī, ada yana talesedig. Ada bouwa nē fara fiya yaor fiya kisi feleya sā anī, dede ta, ed tafedig, <sup>24</sup>anī ere, bouwada nē fara fiya yaor fiya kisi feleya anī, ada to dede ta, ed tafedig. Anī ere, Negur ī bouwa nē fara fiya bagu feleid fen, fara fiya yana sā idi yana odug ifenēdin, <sup>25</sup>anī bunem, bouwa bun foi fiya to ibodōf, anī ere, bouwa nē fara fiya idi abob nigin kilei kilei kisi difouf. <sup>26</sup>Bouwa nē fara fiya takam darau yalouf are, bouwa nē fara fiya ganan ī geid darau daledig. Bouwa nē fara fiya takam yana yalouf are, bouwa nē fara fiya ganan ī geid kulī dedig.

<sup>27</sup>Gama, ā Kristus nē bouwa, are ā mugu mugu anī nē fara fiya. <sup>28</sup>Sios bun Negur ī uyulil aposel ganan igirnēdin, anī dō fiya profet, anī dō fiya tise, age fe di, memelik inoya tamo ado, dagi el fiya nē megeir dalen anidi, tunī isennēdiya nigin kisi feleya anidi, ereb ereb lo fiya nigin megeir dalen anidi, od fire fire nem wogōya nigin kisi feleya anidig igirnēdin. <sup>29</sup>Idi ganan aposel de? Idi ganan profet de? Idi ganan tise de? Idi ganan memelik dinof de? <sup>30</sup>Idi ganan dagi el fiya nē megeir dalef



de? Idi ganan od fire fire nem wogō def de? Idi ganan od fire fire nem wogōya anī falei difef de? <sup>31</sup>Anī ere, Awa Uur nē ege luwa odug yaleya nigin kisi total walogouf.

Gama aya naab gai biya bagai taka afelneif.

### Wau Laa Fiya

**13** <sup>1</sup>Aya tamo nē od fire fire nem ado engel nē od nem wogō aufeg, wau laa fiya sāf are, aya belo gaōya be, kadod ait gūya gen dogol.

<sup>2</sup>Aya profet od wogōya nigin Awa Uur nē ege luwa ado fen, Negur nē waa ganan ado kelei ganan kelei ken, arei godo fiya nigin momoiya odug ado, anī ere, wau laa fiya sāf are, aya tamo ege. <sup>3</sup>Aya ereb aya ado ganan maleg afeneid fen, bouwau atorō di, yā malan dirāf, anī ere, aya wau laa fiya sāf are, aya mala biya taka to alouf.

<sup>4</sup>Wau laa fiya are molol, wau laa fiya are dor yaleya. Ī to kiyei inodig. Ī yogo yana to yalesedig. Ī yogo to seli yabidig. <sup>5</sup>Ī tobonunā sane sā, Ī yogo nigin aya dogol to yedig, Ī kaisā to seye yedig, Ī sane difiyek anī to karī yeledig. <sup>6</sup>Wau laa fiya anī sane nigin to kulī yedig, anī ere, momoi nigin kulī yedig. <sup>7</sup>Ī faimud kulatun fedig, Ī faimud momoi yedig, Ī faimud wau isedig, Ī faimud feseya sā megeir ifaredig.

<sup>8</sup>Wau laa fiya are to bagai sa kalauf. Anī ere, profet od wogōya are sa kalauf, od fire fire nem wogōya are sa kalauf, kelei are sa kalauf. <sup>9</sup>Ere nigin, ada kelei tunī dogol kelei ken, profet od tunī dogol wogō taudig, <sup>10</sup>anī ere, sain kibo feleya bagai anī isiyouf, kibo feleya bagai sā anī sa kalauf. <sup>11</sup>Aya simō bun, aya simō gen wogō aun, aya simō gen kisi afen, aya simō gen karī aun. Sain aya biyau fen, aya simō nē tobonunā dumeun arailen. <sup>12</sup>Gama ada dodo bun gen malakanon yaor sā tailedig, sain ada tarabā fadauf bun tutuk bagai tailauf. Gama aya tunī dogol kelei, sain anī bun Negur aya nigin ganan kelei gen, aya ganan kelei youf.

<sup>13</sup>Are gama towo eneidi difaref, momoiya, wau iseya ado, wau laa fiya. Anī ere, anī atun wau laa fiya anī odug bagai, ganan wal fiya.

### Profet Od Wogōya Ado Od Fire Fire Nem Wogōya Nigin Awa Uur Nē Ege Luwa

**14** <sup>1</sup>Wau laa fiya nē naab dōg fen, Awa Uur nē ege luwa yaleya nigin kisi total walogouf, Awa Uur nē ege luwa bun profet od wogōya nē anī bagai walogouf. <sup>2</sup>Ere nigin, taka Ī od fire fire nem wogō yef, Ī tamo to wogō fiyēdif, anī ere, Ī Negur wogō fiyek. Are, taka nem in od to kelei youf. Ī Awa Uur bunem Negur nē waa wogō yef. <sup>3</sup>Anī ere, taka Ī profet od wogō yef, Ī tamo megeir ifenēdiyof nigin, waud yalesauf nigin ado, waud yo fof nigin wogō fiyēdif. <sup>4</sup>Taka Ī od fire fire nem wogō yef, Ī yogo dogol isennek, anī ere, taka Ī profet od wogō yef, Ī sios isennek. <sup>5</sup>Aya ā ganan od fire fire nem wogō gouf nigin orouf, anī ere, aya ā profet od

wogō gouf nigin orouf bagai. Taka ī od fire nem wogō yef, ī sios isennēf nigin taka nem yogon od to falei foug are, taka ī profet od wogō yef anim, taka ī od fire nem wogō yef anī wal fiya.

<sup>6</sup>Turau tar, aya ā gein asi fen, od fire nem wogō auf sain bun, aya kurō fesiya od tunī, keleī, profet od be, faded fiya nē od, ā bun to arou asiyouf are, ere biya aya ā afeneīf? <sup>7</sup>Ereb idi mata sā aitedif, digē be gita age fiya, idi ailō fire fire to dinouf are, naig fe di, taka nem ere seg kodē def anī keleī youf? <sup>8</sup>Takag, taur ait tutuk to wō youf are, aim kusī nigin dodok foug? <sup>9</sup>Āg age fiya. Ā, āgenei baleim od fire nem yaor to wogō gouf are, taka ī naig fe fen, ā wogō gef anī keleī youf? Ā ege od yau bun urarāgouf dogol. <sup>10</sup>Tenebur ein od fire fire musei dibodok, anī ere, idi gariya sā taka to ibodok. <sup>11</sup>Aya erob taka nem wogō yef, anī nē gariya to keleī youf are, aya wogō yef anī nē yaū tamo, age fe di, ī aya bun yaū tamo. <sup>12</sup>Āg age fiya. Ā Awa Ur nē ege luwa yaleya nigin kabī totol walegedig, anī nigin, sios isennēya nē ege luwa yaleya nigin kabī totol walogouf.

<sup>13</sup>Age fiya nigin, taka ī od fire nem wogō yef, ī erob wogō yef anī falei foug nigin kosē youf. <sup>14</sup>Ere nigin, aya od fire nem kosē auf are, neu uur kosē yef, anī ere, neu kisi faat yūya sā. <sup>15</sup>Anī nigin, aya naig afoug? Aya neu uur bun kosē auf, anī ere, aya neu kisi buneg kosē auf. Aya neu uur bun seg aloug, anī ere, aya neu kisi buneg seg aloug. <sup>16</sup>Ō ogon uur bun Negur yana walesauf are, taka ī idi anī to keleī anidi atun ibodok, ī erob ō urok anī keleī sā nigin, naig fe fen, ī ogon de fiyēya bun “Momi” youf? <sup>17</sup>Ō ogon de fiya are biya bagai, anī ere, taka to usennek.

<sup>18</sup>Aya ā ganan wal yeīya, od fire nem wogō auf nigin Negur de afiyek. <sup>19</sup>Anī ere, sios bun, aya ten tausen od od fire nem wogōya anī fotokar, tunī tai fediya nigin od faif bun yaor wogō auf anī orouf.

<sup>20</sup>Turau tar, āgenei kisi bun simō gen to ufareg. Sane nigin, momou nē kisi gen ufareg, anī ere, āgenei kisi bun biyeī ufareg. <sup>21</sup>Lo bun eig ye itoton:

Odug irok,

“Tamo od fire nem wogō def anidi bunem ado,

yaū tamo sigoreid bunem,

aya tamo kayau eneidi wogō afediyoug,

anī ere, sain anī buneg idi aya to karī difiyoug.”<sup>1</sup>

<sup>22</sup>Anī nigin, od fire nem wogōya are, momoiya tamo kayau bun uris sā, anī ere, momoiya sā tamo kayau bun uris. Anī ere, profet od wogōya are, momoiya tamo kayau bun, momoiya sā tamo kayau bun sā. <sup>23</sup>Anī nigin, sios guru fiya odug bun, tamo kayau ganan od fire nem wogō de di, tunī anī keleī sā be, tunī momoiya sā disiyoug are, idi ā nigin wadā ideneik to douf de? <sup>24</sup>Anī ere, taka ī momoiya sā be, taka ī anī keleī sā, tamo kayau

<sup>1</sup> 14:21 Asaia 28:11, 12

ganan profet od wogō de mog, isiyouf are, ī tamo kayau ganan neid wogōya bunem ī mosor tamo ya anī kisi fokō ye di, tamo kayau ganan ī es difiyēf, <sup>25</sup>age dife di, yogon wau bun iminēdig anī yaorouf. Anī nigin, ī kusureis fen, Negur yana yales, “Momoi bagai, Negur ā atun ibodok,” youf.

### Negur Yana Suma Dōf Yaleseya

<sup>26</sup>Anī nigin, turau tar, ada naig tafouf? Sain ā guru gef, ā ganan atun taka seg ado, taka faded fiya nē od ado, taka kurō fesiya od ado, taka od fire nem wogōya be, od fire nem wogōya anī falei fiya adof. Anī ganan sios megeir fiya nigin ago gouf. <sup>27</sup>Taka ī od fire nem wogō youf are, uru be, towom dogol age fiya sain dale fen, teke tekeleim wogō douf. Age fe di, taka nem od fire nem wogōya anī falei fouf. <sup>28</sup>Od fire nem wogōya anī falei fiya tamo sāf are, wogōya tamo ī sios bun foro yel fen, yogo ado Negur bun wogō youf.

<sup>29</sup>Profet uru be, towom age fiya wogō douf, age de mog, tunī ganan, erēb wogō yef anī el de es difouf. <sup>30</sup>Anī ere, idi guru fiya dibodok anidi atun, kurō fesiya od taka, taka bun isiyouf are, uyu wogō yef are dē yalauf. <sup>31</sup>Ere nigin, ā ganan sain waleg fen, teke tekeleim profet od wogō gouf, anī bunem, ganan keleī dale fen, waud yalesauf. <sup>32</sup>Profet neid uur are profet dogo kulatun dife fen, dogo neid wogōya sain bun dogol wogō douf. <sup>33</sup>Ere nigin, Negur ī ekul fiya nē Negur sā, ī wau inosiya nē Negur.

Tamo kayau fateul neid sios ganan bun age difedig gen, <sup>34</sup>kayau idi sios bun foro del difarauf. Idi wogōya nē modoū to difenēdiyof, anī ere, idi Lo irok kilei, anī dō difouf. <sup>35</sup>Idi erēb taka nigin to fiya orodiyof are, idi neid fō bun dogo neid tamo to difediyof, ere nigin, kayau taka sios bun wogōya are mama ado.

<sup>36</sup>Negur nē od ā bunem gariya inon de? Od anī ā bun dogol isin de? <sup>37</sup>Taka ī kisif, ī profet taka be, ī Awa Uur nē ege luwa alen youf are, ī erēb aya atokeneik are Odug nē itāfiya ya anī keleī youf. <sup>38</sup>Taka ī enei welebi fouf are, ī yogo welebi fiyēf.

<sup>39</sup>Anī nigin, turau tar, profet od wogō gouf nigin kisi total walogouf. Agog fen, od fire nem wogōya nigin to katū wiyēdigouf. <sup>40</sup>Anī ere, erēb erēb ganan suma bagai dōg fen, biya bagai ago gouf.

### Kristus Nē Mata Kel Fāya

**15** <sup>1</sup>Turau tar, aya biya od wogō ayeī di, waleg fen, anī teten ufaregef anī, baban ā kisi turī ayeīf nigin orouf. <sup>2</sup>Ā od aya wogō ayein anī, uroug kafī waleg fen, ege to momoi gen ouf are, biya od enei bunem ā kel gei yeīf.

<sup>3</sup>Ere nigin, erēb aya alen, are odug bagai nigin, uyulil anī aya ā afenein, are Kristus ī, Negur nē Itotoya bun yenek kilei, neda mosor nigin

laa fe di, <sup>4</sup>ī mū difen, are Negur nē Itotoya bun yenek kilei, naa towo bun ī mata kel fā yen, <sup>5</sup>are ī Pita bun wō ye fen, anī dumen in dō fiya tar tuwelf bun wō yen. <sup>6</sup>Anī bure fele di, ī sain tekelei bun tura tar faif handred wal fiya meleid bun wō yen, anidi ganan musei fau dibodok, tunī gare den. <sup>7</sup>Agef fen, ī Jems mala bun wō yen, anī dumen aposel ganan meleid bun wō yen. <sup>8</sup>Anī ganan bure fel fen, idikeleya bun, ī, aya kesu gō fiya sain sā bun gō difiyan gen anī, malau buneg wō yen.

<sup>9</sup>Ere nigin, aya aposel idi atun naal bagai, aya to biya nigin aposel yeya nigineg kisi feleya sā, ere nigin, aya Negur nē sios darau afenen. <sup>10</sup>Anī ere, Negur nē wau ifenēya bunem, aya gama afaref gen age wō aun. Aya bun yogon wau ifenēya anī ege to ilen. Sā, aya kabī total idi ganan wal fediya alen, are ayam sā, anī ere, Negur aya ado ibodon in wau ifenēya anim. <sup>11</sup>Age fiya nigin, ayam be, idim, amā enei wogō mauf, are ā enei momoi gen.

### Gare Den Tamo Neid Mata Kel Fāya

<sup>12</sup>Amā Kristus gare den anidi bun tamal mata kel fā yen anī wogō maudig, anī ere, naig fe di, ā tunī, gare den anidi mata to ke de fā douf gedig? <sup>13</sup>Gare den anidi, mata to ke de fā douf are, Kristus īg mata to kel fā yem. <sup>14</sup>Kristus ī mata to kel fā yem are, nemā wogōya anī kaū sā di, āgenei momoiya areg kaū sam. <sup>15</sup>Age fiyam are, amā Negur nigin idegēya od wogō maudig anī dilemam, ere nigin, amā Negur ī Kristus gare den anidi bun tamal turī fiyen anī kurō mafesidig. Anī ere, Negur ī gare den anidi to turī fediyouf anī momoi ouf are, ī Kristus to turī fiyem. <sup>16</sup>Ere nigin, Negur ī gare den anidi to turī fediyouf are, ī Kristuseg to turī fiyem. <sup>17</sup>Negur ī Kristus to turī fiyem are, āgenei momoiya are ege, ā āgenei mosor bun fau ubodōgef. <sup>18</sup>Age fiyam are, idi Kristus nigin momoi de fen, gare den anidig fō delem. <sup>19</sup>Ada ein mata ibodōya enei nigin dogol, Kristus bun wauda iseya adouf are, ada tamo ganan wal fediya maladalon ado.

<sup>20</sup>Anī ere, Kristus momoi bagai gare den anidi bun tamal kel turī fiyen, are idi gare den anidi bun tamal faat uyulil yun gen. <sup>21</sup>Are, laa are tamo tekelei bunem isin nigin, gare den neid kel fāya areg tamo tekelei bunem isif. <sup>22</sup>Are, Adam bun ganan gare dedig, age fiya gen, Kristus bun ganan mata ifenēdiyouf. <sup>23</sup>Anī ere, idi mugu mugu dogo neid sain bun age difouf: Kristus ī uyulil faat yūya, anī dumen, ī isiyouf sain bun, idi yogon dibodok anidi, mata ke de fā douf. <sup>24</sup>Anī bure fele di, idikeleya sain isiyouf, sain anī bun, Kristus ī gawaman ganan, yeneid ado ganan, megeir ganan daū fel fen, tano anī yale, Dei Negur ima bun inouf. <sup>25</sup>Ere nigin, ī king ibodok ile, yogon kiwai tar ganan yogo ye farumen inenēdiyouf sain anī bun. <sup>26</sup>Kiwai idikeleya bun daū fiya nē, are laa. <sup>27</sup>Are Negur nē Itotoya bun eig ye irok kilei, “Negur ī ereb ereb ganan

yogo ye farumen inenēdin.”<sup>m</sup> Sain ī irok, are ereb ereb ganān ī farumen inenēdin, are Negur ī ereb ereb ganān Kristus farumen inenēdin, Negur ī yogo enei farumen to ibodok ya anī yaor. <sup>28</sup>Sain Negur ī enei age fel fen, Naal yogo, Negur ī ereb ereb ganān Kristus farumen inenēdin anī, farumen inenēf, anī bunem, Negur ī ereb ereb ganān nē mudur ibodōf.

<sup>29</sup>Mata kel fāya anī sāf are, idi tamo gare den anidi nigin naan dalef idi naig difouf? Tamo gare den anidi to bagai kel turī fediyouf are, ere nigin tamo kayau idi nigin naan daledig? <sup>30</sup>Takag, amā nigin, ere nigin amā mug sain ganān bouwamā waila bun manenēdig? <sup>31</sup>Turau tar, aya ā neda Odug Kristus Jesus bun ubodōgef nigin, yanau alesedig anī bunem, momoi bagai enei totol bagai arok, are aya naa ganān laa bun eledig. <sup>32</sup>Aya tamo nē kisi bunem dogol, Efesus oun gaar kuī geid kusī aun ouf are, ere mala biya anī aya alen? Tamo gare den anidi to kel turī fediyouf are, Negur nē Itotoya bun yenek kilei,

“Saaf ado naan tāf,  
ere nigin, nil gare tauf.”<sup>n</sup>

<sup>33</sup>Ā taka nem to idegneif. “Sane geid nigal yūya bun, tobonunā biya daū fedig.” <sup>34</sup>Kisi biya bun kel usig ufareg fen, mosor inoya utorōg, ere nigin, ā atun tunī Negur nigin keleī sā difaref. Aya ā mama yeif nigin enei wogō auf.

### Kel Fāya Nē Bouwa

<sup>35</sup>Anī ere, taka nem to fouf, “Tamo gare den anidi, naig fe kel turī fediyouf? Bouweid naig fiya bagai ado disiyouf?” <sup>36</sup>Ā neneya bagai! Ereb ō tu wouf anī, to laa fouf are, anī mata to wō youf. <sup>37</sup>Sain ō tu wof, ō fau ibodōf nē bouwa anī to utenek, anī ere, wit be, ereb taka nē faat dogol.

<sup>38</sup>Anī ere, Negur ī oron kilei, bouwa ifenēdig, agef fen, ī faat fire fire dogo neid bouweid fire fire ifenēdidig. <sup>39</sup>Bouwa ganān tekelei sā. Tamo nē bouwa are fire, gaar bouwa fire, ninā bouwa fire, gau bouwa fire.

<sup>40</sup>Saa ilun nē bouweid ado di, tenebur nē bouweideg ado. Anī ere, saa ilun nē bouweid fula fiya medeīya fire di, tenebur nē bouweid fula fiya medeīya areg fire. <sup>41</sup>Gaa are futu reya fire di, ogō are futu reya fire, age fe di, barisa are futu reya fire. Barisa idi atuneg futu reya fire fire ado.

<sup>42</sup>Age fiya gen, tamo gare den anidi neid mata kel fāya areg age fouf. Bouwa tu fiyaf nē are bura le di, bouwa kel fā yef nē are to bura ledig.

<sup>43</sup>Sane bun tu fiya di, fula fiya medeīya bun kel fā yef. Totol sā tu fiya di, totol ado kel fā yef. <sup>44</sup>Bouwa buru maug are tu fiya di, uur nē bouwa are kel fā yef.

Bouwa buru maug ibodok are, uur nē bouwag ibodok. <sup>45</sup>Anī nigin, Negur nē Itotoya bun eig ye irok, “Uyulil inon tamo Adam ī mata ibodōya

<sup>m</sup> 15:27 Sam 8:6    <sup>n</sup> 15:32 Asaia 22:13

wō yen.”<sup>o</sup> Idikeleya Adam ī mata ifenēya nē uur wō yen. <sup>46</sup>Uur nē bouwa ketem to isin, anī ere, bouwa buru maug ketem isin. Age fe di, anī dumen, uur nē bouwa. <sup>47</sup>Uyulil inon tamo are tenebur aas nē, anī dō fiya tamo are saa ilun nē. <sup>48</sup>Tenebur nē tamo idi, tamo teneub nem inon gen. Saa ilun nē tamo idig, tamo saa ilun tamal gen. <sup>49</sup>Ada tenebur tamo inon age fiya tabodok gen, adag tamo saa ilun tamal age fiya tabodōf.

<sup>50</sup>Turau tar, aya ā arokeneik, are tenebur nē bouwam Negur nē tano to akorou youf. Ereb bura ledig anīg to bura lauf anī to akorou youf. <sup>51</sup>Karī wog, aya waa taka arokeneif: Ada ganan to gare tauf, anī ere, ada ganan bouwada falei foug, <sup>52</sup>are ereb fili yeleya be, mala kamisāya gen idikeleya nē taur aitouf bun, bouwada agef falei foug. Taur aite di, tamo gare den anidi kel turī fedī di, to buraya nē ado fā douf, age fe di, ada bouwada falei foug. <sup>53</sup>Are, buraya nē anī to burauf nē anī ifonūf. Laa fiya nē anī to laa foug nē anī ifonūf. <sup>54</sup>Buraya nē anī to burauf nē anī ifonūf, laa fiya nē anī to laa foug nē anī ifonūf sain anī bun, Negur nē Itotoya bun ibodok enei agef kisi fel wō youf, “Negurem kusī bun laa wal fe fen, anī adok itob len.”<sup>p</sup>

<sup>55</sup>“O laa, ogon kusī wal fiya nē megeir nain?

O laa, ogon waila nain?”<sup>q</sup>

<sup>56</sup>Laa nē waila are mosor, mosor nē megeir are lo. <sup>57</sup>Anī ere, Negur de tafiyēf! Ī neda Odug Jesus Kristus bunem kusī wal fiya ifanadadig.

<sup>58</sup>Anī nigin, neu turau tar oboiyou, totol ufareg. Ereb takam to yokū yeif. Faimud Odug nē kabī fatuk bagai walogouf, ere nigin, ā keleī, are ā Odug bun kabī walegef anī, ege to ilauf.

### Negur Nē Tamo Kayau Isennēdiya Nigin Kolekta

**16** <sup>1</sup>Gama Negur nē tamo kayau isennēdiya nē kolekta nigin, ereb aya Galesia sios age difoug nigin arokenēdin anī ago gouf. <sup>2</sup>Uub ganan nē naa matu bun, ā mugu mugu, augeneī moni walegedig anī foig, fire unog fen, kuru gouf, anī bunem, sain aya asiyouf bun, kolekta baban to unogouf. <sup>3</sup>Sain aya wō auf, tamo ā uginrēdigen anidi bun, pas afeneid fen, āgenei ege luwa ado Jerusalem sur afediyouf. <sup>4</sup>Ayag idi geid ileya nigin deuf are, idi aya geid weim malauf.

### Pol Nē Wau Irōya

<sup>5</sup>Aya Masedonia provins atu atu ele fen, ā gein asiyouf, ere nigin, aya Masedonia atu atu alauf. <sup>6</sup>Aya ā geid sain naal tabodōf be, yau ado menig sain bun ā geid tabodōf, anī bunem, ā neu iyōya nain be alauf bun usennagauf. <sup>7</sup>Aya gama ā ailiyei ken, sain naal ki yeīya anī to orouf. Odug yo youf are, aya sain naal meluk ā geid tabodōf anī wau irok. <sup>8</sup>Anī

<sup>o</sup> 15:45 Jenesis 2:7   <sup>p</sup> 15:54 Asaia 25:8   <sup>q</sup> 15:55 Hosia 13:14

ere, aya Efesus ein abodok ele, Pentikos naa wō youf, <sup>9</sup>ere nigin, kabī kaū ado nē sukar odug, aya bun kā fen, age fe di, musei aya kiwai difanaf.

<sup>10</sup>Timoti isiyouf are, ī ā geid ibodōf bun, ī ereb taka nigin to kumī youf nigin lo welegei, ere nigin, ī aya gen Odug nē kabī faali fef. <sup>11</sup>Anī nigin, taka nem ī yaleya nigin to itorōf. Yogon delē bun wau inosiya ado sur wiyēge di, ī aya gein kel isiyouf. Ī tura tar geid disiyouf nigin, aya ololo afedif.

<sup>12</sup>Neda turada Apolos nigin, ī tura tar geid ā gein dilauf nigin, aya totol bagai arokenen. Ī gama ileya nigin wau yenēya sā, anī ere, ī ileya nigin sain biya isiyouf are, ī ilauf.

<sup>13</sup>Lo welegei, momoiya bun totol ufareg, tamo totol ado kumī sā wōg, totol waleg. <sup>14</sup>Ereb ereb ganan wau laa fiya bun ago gouf.

<sup>15</sup>Ā keleī, are Stefanas nē ibor, Akaia provins oun uyulil momoiya tamo kayau wō de fen, idi dogo neid oroya dō de, Negur nē tamo kayau disennēdiyof nigin, kabī totol daledig. Turau tar, aya totol bagai arokeneik, <sup>16</sup>are ā eneidi age fediya ado, idi ganan kabī bun disi fen, kabī dalef anidi farumen ubodōg. <sup>17</sup>Sain Stefanas, Fotunatus ado, Akaikus wō den, aya wau al fen, ere nigin, ereb ā bun tamal ifanamāya anī, idim ā fotokar difanaman. <sup>18</sup>Are, idi age dife di, neu uur ado āgeneig filolō fen. Anī nigin, tamo age fediya nigin de fiyēdiya nē kisi walogouf.

### Idikeleya Nē Aanya

<sup>19</sup>Asia provins bun sios idi, ā bun aanya sur difef. Akwila Prisila ado aanya, wau sere fiya ado Odug bunem ā bun sur difef. Sios idi neid fō bun guru difedig idig age difef. <sup>20</sup>Ein tureī tar ganan ā bun aanya sur difef. Ā abob aan wiyēg fen, fateul bunem umā gouf.

<sup>21</sup>Aya, Pol imaum bagai aanya enei atotof.

<sup>22</sup>Taka ī Odug nigin wau to laa fouf are, isisiya ī bun isiyouf. O Odug, usi!

<sup>23</sup>Odug Jesus nē wau ifenēya, ā bun ibodōf.

<sup>24</sup>Neu wau laa fiya, Kristus Jesus bunem ā ganan bun ibodōf. Momoi.